



Siromaštvo je apsolutno najveći problem obrazovanja

U 14. epizodi "Besjeda o obrazovanju" završena je ljetnja među-sezona. Voditelji su ugostili Lanu Jurko i Dženanu Husremović, a tema je bio Globalni izvještaj o praćenju obrazovanja 2021, s naglaskom na inkluziju u obrazovanju.



Četnaestom epizodom Besjeda o obrazovanju završila se ljetnja među-sezona ovog obrazovnog podcasta. Produkcija će napraviti malu pauzu u emitovanju novih emisija kako bi se pripremila za jesenju, treću sezonu.

U poslednjoj epizodi ljetnjih Besjeda o obrazovanju, voditelji Namir Ibrahimović i Nedim Krajišnik su u studiju u Sarajevu ugostili Lanu Jurko, ispred Mreže centara za obrazovne politike i Dženanu Husremović, profesoricu sa Filološkog fakulteta u Sarajevu.

Glavna tema ovog razgovora je [Globalni izvještaj o praćenju obrazovanja za 2021. godinu](#), sa naglaskom na inkluziju u obrazovanju. Riječ je o izvještaju koji je analizirao 30 obrazovnih sistema u središnjoj i istočnoj Europi, Kavkazu i središnjoj Aziji a pripremili su ga UNESCO Global Education Monitoring Report i Europska agencija za posebne potrebe i uključivo obrazovanje i Mreža centara za obrazovne politike

Profesorica Husremović je na početku razgovora govorila o [17 Ciljeva održivog razvoja](#) koji su doneseni na globalnom nivou a ratificirani su i u BiH.

- „U pitanju su ciljevi koje je svijet postavio sebi kako bi nam svima bilo bolje. Četvrti cilj se tiče obrazovanja i govori o tome kako ono mora biti dostupno svima.“ kazala je profesorica Husremović.

Upitana o tome koliko su zemlje u regiji blizu ili daleko od inkluzivnog obrazovanja, Lana Jurko je odgovorila da smo svi u regionu jako daleko od inkluzivnog obrazovanja, a pogotovo u značenju u kojem ga mi razumijevamo na ovim područjima.

Mreža centara za obrazovne politike se bavi i istraživanjem kako siromaštvo utiče na obrazovanje, te je tokom istraživanja ove teme došlo do zaključka da je „siromaštvo apsolutno najveći problem u obrazovanju i djecu koja dolaze iz siromaštva sustav ne podržava da bi oni uspjeli prekinuti taj začarani krug siromaštva“ kazala je Lana Jurko.

Inkluzija je ključna i u visokom obrazovanju, kod nas nema toliko diverziteta među studentima koji pohađaju visokoškolsku nastavu. Ukoliko bi se na tom nivou inkluzija ostvarila, ona bi itekako doprinijela društvu, ispričala je **Dženana Husremović**.

„Ako mi želimo da odlučimo da budemo društvo jednakih, društvo u kojem svi osjećamo pripadnost, onda se inkluzija lako dešava.“ rekla je Dženana Husremović.

Zapratite [Facebook stranicu Besjede o obrazovanju](#) gdje će pravovrijemeno biti podijeljene informacije o novoj, jesenjoj sezoni ovih sjajnih razgovora.

Tema epizode: *Siromaštvo je apsolutno najveći problem obrazovanja*

Epizodu možete pogledati na ovom linku: [LINK](#)

Collections

Autorski tekstovi

Besjede o obrazovanju